

**Uunga siunnersuut: Ilisimatusarfik pillugu Inatsisartut inatsisaat nr. xx, xx. xxx
2018-imeersoq**

*Ilinniartitaanermut, Kultureqarnermut, Ilageeqarnermut Nunanullu Allanut
Naalakkersuisumit saqqummiunneqartoq*

pillugu

**Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliap**

siunnersuutip pingajussaaneerpeqarneranut

ILASSUTITUT ISUMALIUTISSIISSUTAA

Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap
suliarinninnermini ilaasortarai:

Inatsisartunut ilaasortaq Doris J. Jensen, Siumut, siulittaasoq

Inatsisartunut ilaasortaq Mimi Karlsen, Inuit Ataqtigiit, siulittaasup tullia

Inatsisartunut ilaasortaq Laura Táunâjik, Siumut

Inatsisartunut ilaasortaq Nivi Olsen, Demokraatit

Inatsisartunut ilaasortaq Sofia Geisler, Inuit Ataqtigiit

UPA 2019-imi ulloq 29. maj aappassaaneerinninnerup kingorna ataatsimiititaliap siunnersuut
aammaarluni misissorpaa.

1. Allannguutissatut siunnersuut

Siunnersuutip matumani pineqartup aappassaaneerpeqarnissaanut isumaliutissiissummini
siunnersuutip matumani pineqartup pingajussaaneerpeqarnissaanut allannguutissatut
siunnersuuteqaqqullugit ataatsimiititaliap Naalakkersuisut qinnuigai.

Ataatsimiititaliap qinnutaa Naalakkersuisut malinniarsimavaat, tamannalu tunngavigalugu allannguutissatut siunnersuummik nassiussillutik. Allannguutissatut siunnersuut matuma kinguliani sammisanut agguataarlugu sammineqassaaq.

2. Ataatsimiititaliap allannguutissatut siunnersuummik suliarinninnera

2.1 Ilisimatusarfiup siulersuisui – sumi najugaqarnissamut piumasagaat

Allannguutissatut siunnersuummi imm. 1 aamma 3 naapertorlugit ataatsimiititaliap kissaataa Naalakkersuisunit malinneqartoq ataatsimiititaliamit oqaatigineqassaaq.

2.2 Ilisimatusarfiup siulersuisui – inassuteqaatinik pissarsiniarneq

Allannguutissatut siunnersuummi imm. 2 naapertorlugu ataatsimiititaliap kissaataa Naalakkersuisunit malinneqartoq ataatsimiititaliamit oqaatigineqassaaq.

2.3 Rektorimut/ prorektorimut Ph.d.-tut piumasagaatit

Ataatsimiititaliami ikinnerussuteqartut kissaataat Naalakkersuisut malissimangikkaat ataatsimiititaliamit oqaatigineqassaaq. Taamaalillunilu Ilisimatusarfimmi prorektorip ph.d.-iunissaanik piumasagaatip allanngortinneqarnissaa allannguutissatut siunnersuutini siunnersuutigineqanngilaq.

2.4 Ilisimatusarfimmi pisortat Ph.d.-tut ilinniarsimanissaannik piumasagaat

Allannguutissatut siunnersuummi imm. 7 aamma 8 naapertorlugit ataatsimiititaliap kissaataa Naalakkersuisunit malinneqartoq ataatsimiititaliamit oqaatigineqassaaq.

2.5 Ilinniagartuut siunnersuisoqatigiivi

Allannguutissatut siunnersuummi imm. 4 aamma 5 naapertorlugit ataatsimiititaliap kissaataa Naalakkersuisunit malinneqartoq ataatsimiititaliamit oqaatigineqassaaq.

2.6 Taxameteri malillugu tapiisarneq

Siunnersuummi imm. 9-mi ima allassimasoqarpoq:

§ 27, imm. 2, imatut oqaasertalerneqarpoq:

”Imm. 2. Ilisimatusarfimmut aningaasaliissutit ilai annikitsut Ilisimatusarfiup isumasioreerneratigut taxamiiterit malillugit tapiissutitut tunniussaasinnaapput imaluunniit tunngavinnik aalajangersimasunik nalilerneqarsinnaasunik, ineriartortitsinissamut isumaqatigiissummi aalajangersagaasunik tunngaveqartitaasinnaallutik, tak. § 7, imm. 1.”

Aalajangersakkamut taaneqartumut nassuiaatini ima allassimasoqarpoq:

“Aalajangersagaq allanngortinneqassasoq siunnersuutigineqarpoq taamaalilluni maannakkut inatsisip oqaasertaanit erseqqissumik takuneqarsinnaalerluni, aningaasaliissutit ilai killeqartut kisimik taxamiiterit malillugit tapiissutitut tunniussaasinnaapput imaluunniit tunngavinnik aalajangersimasunik nalilernerqarsinnaasunik, ineriartortitsinissamut isumaqatigiissummi aalajangersagaasunik tunngaveqartitaasinnaasut. Annikinnerusuni paasineqarpoq tapiissutit affaanit annikinnerusut, naatsorsuutigineqarluni 20-30 procentinik annertunerunngitsut.

Aammattaaq aalajangersakkamut ilanngunneqarluni taxamiiterit malillugit tapiissutitut tunniussaasinnaaneritut tunngaviusoq tamanna Ilisimatusarfik isumasiorlugu pissasoq. Taamaalilluni tunniussinissaq pillugu Naalakkersuisut aamma Ilisimatusarfiup akornanni oqallisigineqassaaq, taamaalilluni aningaasatigut kajumissaat tapiissutit kingunerisassaat Ilisimatusarfiup sulineranut imaluunniit ilinniagaqartunut ajortumik sunniuteqarnani. Peqatigisaanik taxamiiterit malillugit tapiissutit ilinniartitaanernut naapertuuttunut taamaallaat atorneqarnissaat qulakkeerneqassaaq.

Tapiissutinik tunniussineq ineriartortitsinissamut isumaqatigiissuteqarnermut atatillugu oqallisigineqassaaq, § 7, imm. 1 malillugu siulersuisut aamma Naalakkersuisut akornanni isumaqatigiissutigineqartussaaq. Ineriartortitsinissamut isumaqatigiissut peqataasut paaseqatigiinnerisigut piareersarneqassaaq, taamatullu isumaqatigiissutip kissaatigineqartumik sunniuteqarnissaa ineriartortitsinissaamullu pisariaqarluni tamatuma Ilisimatusarfimmuut aningasatigut iluanaarutaanissaa.”

(Ataatsimiititaliap erseqqissaanera)

Siunnersuutip matumani pineqartup aappassaaneerneqarnissaanut ataatsimiititaliap isumaliutissiissutaani ataatsimiititaliamit oqaatigineqarpoq taxameteri malillugu tapiisarnit killilimmik atorneqarnissaannik naatsorsuutiginninneq siunersuinermit paasissutissiissutigineqartoq inatsisissatut siunnersuummi tassungaluunniit nassuiaatini allassimangimmat. Naalakkersuisut allannguutissatut siunnersuuteqarnerminni siunertaq taanna aalajangersakkamut oqaasertaliussassatut siunnersuutigineqartumi tassungalu atasumik inatsimmi nassuiaatini erseqqissaanermi allassimagaat ataatsimiititaliamit oqaatigineqassaaq.

Ataatsimiititaliamittaaq maluginiarneqarpoq taxameteri malillugu tapiisarnit ineriartortitsinissaq pillugu isumaqatigiissuteqartussaanermut atatillugu oqaluuserineqarnissaat Naalakkersuisunit naatsorsuutigineqartoq. Taama naatsorsuuteqarneq ataatsimiititaliamit tusaatissatut tiguneqarpoq.

Aappassaaneerinninnissaq sioqqullugu ataatsimiititaliami siunnersuummik suliarinninnermut atatillugu siunnersiuinerimi ima paasissutissiisoqarpoq:

"Periarfissaassanngippat tapiissutit ilaasa taxameteri atorlugu tapiissutitut tunniunneqartarnissaannut, ineriartortitsinermut isumaqatigiissutip sunniutissaasa ilai annikinnerulissapput, Ilisimatusarfiup ineriartortinneqarnissaanut aningaasaqarnikkut kaammattuutissat ilaat annikinnerulissammata."

Taama isumaqarneq ataatsimiititaliamit isumaqatigineqanngilaq. Taamaalillunilu ataatsimiititaliap ersarilluinnartumik naatsorsuutigaa ilinniartunik tigusinissaq ilinniarnermillu naammassinninnissaq (tassungalu ilanngullugu ilinniarnep nalinginnaasumik sivilisussusissaa naapertorlugu naammassinninneq) ineriartortitsinissaq pillugu isumaqatigiissummut attuumassuteqartariaqanngitsut. Siunnersuutaqaartumi § 7, imm. 1-2-mi ima allassimasoqarpoq:

§ 7. Naalackersuisut ineriartortitsinissaq pillugu siulersuisunut isumaqatigiissuteqassapput.

Imm. 2. Ineriartortitsinissaq pillugu isumaqatigiissutip imarisassai pillugit maleruagassanik Naalackersuisut aalajangersaasinnaapput.

§ 7, imm. 1-2-mut nassuiaatini matuma kinguliani allassimasumik itisiliisoqarpoq:

Imm. 1-imut Aalajangersakkami aalajangerneqarpoq Naalackersuisut siulersuisullu akornanni ineriartortitsinissaq pillugu isumaqatigiissuteqartoqartassasoq.

Ineriartortitsinissamut isumaqatigiissuteqarnermi siunertaavoq Naalackersuisut Ilisimatusarfiullu siulersuisuisa sakkussaq taanna atorlugu, sinaakkusiussat siunertallu Inatsisartut inatsisaanni aalajangersagaasut iluanni universitetip ineriartortinnissaanut kissaatigisatik oqaloqatigiissutigisinnaassammategit tulluarsarlugillu. Angusaqarnissaq pillugu isumaqatigiissut pinnagu ineriartortitsinissamik isumaqatigiissutip atorneratigut takutinniarneqarpoq, aalajangersimasumik angusaqarnissaq pinnagu ineriartortitsinissaq qitiutinneqassasoq. Ineriartortitsinissarli pillugu isumaqatigiissummi suliaqarfanni aalajangersimasuni ineriartortitsinermut anguniakkanik aalajangersimasunik aalajangersaasoqarsinnaajuassaaq, assersuutigalugu unitsitsiinnartartunik ikilisaaniarneq.

Ineriartortitsinissamut isumaqatigiissummi Ilisimatusarfiup ukiuni killilinni suut anguniagarissanerai suullu anguniakkat ilagissaneraat aalajangersarneqassaaq. Ineriartortitsinissamut isumaqatigiissut aningaasaqarnikkut aalajangiisunut arlallialunnut

attuumassuteqarsinnaavoq, taamaasilluni aningaasanut inatsisikkut akuersissutit ilaat anguniakkat anguneqarnerannut apeqqutaalersillugit.

Imm. 2-mut Ineriartortitsinissamut isumaqatigiissutip sunik imaqartussaanaera pillugu maleruagassanik erseqqinnerusunik Naalakkersuisut aalajangersaasinnaanerannut aalajangersagaq tunngavissiivoq. Assersuutigalugu ineriartortitsinissamut isumaqatigiissutip qanoq sivisutigisumik atuunnissaanut maleruagassaasinnaapput, naliliinermut killiffiit aalajangersimasut pillugit maleruagassaasinnaallutik, taxameteri malillugu tapiissutaasinnaallutik il.il

(Ataatsimiititaliap erseqqissaanera)


Ineriartortitsinissaq pillugu isumaqatigiissutit assersuutigalugu Ilisimatusarfimmi ilisimatusarnikkut ingerlatanut imaluunniit ilinniartut piginnaasaannik qaffassaanermut taamaallaat tunngasinnaanerat aalajangersagassatut siunnersuutigineqartukkut periarfissiuunneqarpoq. Tassunga atatillugu ingerlatanik aqutsinermut sakkoq taxameteri malillugu tapiisarnertut ittoq ineriartortitsinissaq pillugu isumaqatigiissummi anguniakkat anguneqarnissaannut kajumilersitsisinnaanngitsoq ataatsimiititaliaq naliliivoq. Tassa taxameteri malillugu tapiisarnerit ilinniartunik tigusernut aammalu ilinniartut akornanni naammassinnittartunut tunngasutut isigineqarmat.

Tassunga atatillugu ataatsimiititaliamit erseqqissaatigineqassaaq aalajangersagassatut siuliani siunnersuutigineqartoq tassaasoq malinneqarsinnaasoq, imaanngitsorli pinngitsoorani malinneqassasoq. Taamaalillunilu ataatsimiititaliaq ersarilluinnartumik isumaqarpoq taxameteri malillugu tapiisarnernik aaqqissuussineq, qanorluunniit killilerneqaraluarpat, inatsimmi pissutsit pisariaqartut allat atuutilersinneqarnissaannut pisariaqavinningitsoq.


3. Ataatsimiititaliap inassuteqaatai

Ataatsimiititaliap **isumaqatigiittup allannguutissatut siunnersuut akuerineqassasoq** inassutigaa.


Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut pingajussaaniigassanngortippaa.



Doris J. Jensen
Siulittaasoq




Mimi Karlsen
Siulittaasup tullia



Laura Táunâjik



Sofia Geisler



Nivi Olsen